

Vischnancas burgaisas era suenter fusiuns

Il cussegl grond suonda la proposta da la regenza

■ **(anr/fa) Tar fusiuns da vischnancas grischunas duain ils abitants da quelas pudair decider sch'ells vulan mantegnair lur vischnancas burgaisas u las abolir. Quai ha decis il cussegl grond cun 101:0 vuschs.** Durant il mais favrer 2011 ha il parlament grischun approvà la refurma territoriala e da vischnancas. La finamira è da simplifitgar las structuradas politicas en il chantun. Quai vulan ins cuntanscher cun fusiunar vischnancas politicas. Mardi ha il cussegl grond tractà in emprim project parzial da questa refurma territoriala: Quests midaments da la constituziun chantunala e da la lescha da vischnancas reglan il futur da las vischnancas burgaisas. La regenza aveva proponì da laschar tscherner a las vischnancas ina da quatter pussaivladads (vesair box). Cun quella proposta preschentada dal president da la cumissiun predeliberanta *Urs Marti* (pld, Cuira) n'era la fracziun da la ps betg d'accord.

«Ina cuntradiziun a la finamira da simplifitgar»

«Sch'il chantun vul simplifitgar e modernisar sias structuradas datti mo ina, abolir las vischnancas burgaisas», ha ditg *Peter Peyer* (ps, Trin). Tenor el èn questas vischnancas burgaisas ina instituziun democraticamain problematica: «Mo ina pitschna gruppa po decider davart il possess public e davart la naturalisaziun, tgi

che po daventar nov burgais da la vischnanca.»

A ses avis èn quai decisiuns, tar las qualas tut ils abitants da las vischnancas, «damai las vischnancas politicas», duain avair pled en chapitel. *Leo Jeker* (pbd,

Tschintg Vits) dentant ha punctuà che fusiuns da vischnancas hajan mo success, sch'ellas succedian senza sforz, «e quai è il cas cun la proposta da la regenza». Era *Michael Pfäffli* (pld, Engiadin'Ota) ha cusseglià da sustegnair la proposta da la

regenza, «cun dar la pussaivladad da mantegnair las vischnancas burgaisas crescha la prontadad da las vischnancas da fusiunar.»

Vischnancas survegnan pussaivladad da tscherner

Remo Cavegn (pcd, Razén) ha proponì da betg tractar la revisiun: «Mo 20 perschient da las vischnancas han era vischnancas burgaisas, perquai na dovri questa revisiun parziala betg, la regulaziun vertenta basta.» El ha già il sustegn da *Luca Tenchio* (pcd, Cuira), il qual ha numnà sco exempel il project da fusiun Glion plus: «Da las 14 vischnancas che

vulan fusiunar han mo la mesadad era vischnancas burgaisas – tgenina da questas set vischnancas burgaisas decida tgi che daventa nov burgais da la vischnanca fusiunada?» La maioritad dal parlament era dad auter avis: Cun 83:27 vuschs han els decis da tractar la revisiun parziala sco proponida da la regenza. «Cun nossa proposta essan nus pli flexibels e dain a las vischnancas la pussaivladad da tscherner quala varianta ch'ellas prefereschon», ha ditg la presidenta da la regenza *Barbara Janom Steiner*. Cun 101:0 vuschs e 0 abstenziuns da la vusch ha approvà il cussegl grond la revisiun parziala da la lescha da vischnancas.



Mo bel e bain 12% dals abitants da Cuira èn era burgais da la citad.

FOTO N. SIMMEN

Da mantegnair fin abolir las vischnancas burgaisas

Causa ch'ina part da las vischnancas burgaisas possedan gronds bains e possess, p. ex. terren da fabrica, è ina part dals abitants da vischnancas cunter fusiuns cun autras vischnancas. Els teman da stuair partir lur possess cun ils partenaris da fusiun. La proposta da la regenza, la quala il cussegl grond ha approvà mardi, cuntogna quatter pussaivladads per schliar questa problematica: Vischnancas politicas e burgaisas fu-

siuneschan e portan il num da la nova vischnanca fusiunada. La segunda pussaivladad prevesa dad abolir las vischnancas burgaisas. Sco terza duain las vischnancas burgaisas pudair sa transformar en corporaziuns che administreschan lur possess. L'ultima varianta da la proposta è da dar a las vischnancas burgaisas la pussaivladad dad exister vinavant sco fin uss e da decider, tgi che daventa nov burgais da la vischnanca.